

SÁMEDÁIDDA JA DUOJIT SIHKE IKONAT JA GIRKOTEKSTILLAT SÁMI GIRKO- BEIVVIIN ANÁRIS 12. – 14.6.2009

Anára Sámi girkobeivviid prográmmii gullá girkolaš dilálašvuodaid ja konsearttaid lassin maid al-
ladássásaš dáidda- ja duodječájáhus, masa leat bovdejuvvon sámi dáiddárat ja duojárat Ruotas,
Norggas ja Suomas. Ruota Sohpparis boahá *Britta Marakatt-Labba*, geas oaidnit dávváliid ja gir-
kotekstiillaid. *Rannveig Persen* Norgga Kárášjogas ovdanbuktá čuovgagovaid ja digitála kollášaid.
Anára čehppodaga čájehit *Aune Kuuva*, *Merja Aletta Ranttila* ja *Pekka Hermanni Kyrö*. Aune Kuu-
va válmmaštan máinnasdohkát buđaldit luonddu birrasis, dohkáid lea govven fotográfa *Martti Rik-
konen* Anáris. Merja Aletta Ranttila ođđa govain leat engelat. Pekka Hermanni Kyrö málagovain fas
oaidnit su iežas mihtilmas stiillain ráhkaduvvon muohtaduoddariid. Ohcejohkalaš *Outi Pieski* stuor-
ra, silkkiid ala njuhtton govain lea valjit čuovga ja sámeduoji dovdu.

Ohcejoga searvegoddi lea luoikan Anára čájáhusii girkotekstiillaid, maid lea plánen arkiteakta-
doaimmahat Matti Porkka Ky ja gorron *Päivi Ruottinen* Roavvenjárggas 1992. Girkotekstiillaide
gullet maid Lappi ortodoksalaš searvegotti ipmilbálvalusbiktasat. Go báhpát doaimmahit ipmilbálv-
alusaid, rohkobottuid, mysterioid dahje eará doaimmahusaid, sii geavahit erenoamáš ipmilbálv-
alusbiktasiid. Dán geavada vuodđun lea Ipmila profeta Mosesii addin rávvagat goaruhit báhpaide
earenoamáš biktasiid bassi doaimmahusaid doaimmaheame várás (2. Moses 28). Dáid lassin álbmot
beassá oahpásmuvvat vel eará ortodoksalaš ipmilbálvalusain geavahuvvon gálvuide.

”Engeliid stuorra sisabohtima” dahjege gávccii ikona lea málen *Elli Tiittanen* Vihanti-nammasaš
báikkis. Su isit *Veikko Tiittanen* lea duddjon ikonaid vuoduid. Tiittas-bárragoddi lea skenken iko-
noid, mat dasto heñgejuvvojit Njellema ortodoksalaš girku sisdordnii. Fotográfá Topi Ikäläinen
čuovgagovvačájáhus Davvitempelat muitala min bismagotti historjjá ja dán beivvi birra, ja nuortti
ortodoksalaš girku rikkes árbevieru birra min bismagotti guovllus.

Sámi Duodji ry buktá čájáhusii aktiivvalaš duojáriid, geat ovdanbuktet duddjoma ja čájehit iežaset
dujjiid. Suoma sámiid oktasaš duodjesearvi vuodđuduvvui jagis 1975, ja dalle searvvi namman lei
Sápmelaš Duođjára ry. Anáris ja Heahtás leat searvvi doaibmabáikkid, gos leat duodječájáhusat
sihke vuovdin láhkai sámi duojit. Dasa lassin doppe sáhtta oastit sámi girjjálašvuoda ja musihka.

Čájáhusa rahpá Sámedikki sátnedođiheadji Klemetti Näkkäljärvi, ja bisma Samuel Salmi sivdnida
čájáhusa. Rahpandilálašvuoha ordnejuvvo Anára girkosiidda vuolleskuvllas duorastaga 11.6. dmu
19.00 bovdejuvvon gussiide, muhto álbmot lea buresboahán geahččat čájáhusa nuvttá bearjadaga ja
lávvardaga dmu 10.00 – 20.00 ja sotnabeivve dmu 10.00-18.00. Čájáhus bistá dušše golbma
beivve, nu ahte gánnáha gal doapmat Anárii girkobeivviid áigge 12. – 14.6., juos háliida oahpás-
muvvat dáid dujiide. Lassedieđuid čájáhusa birra addá Anni Näkkäljärvi, Sámedikki skuvlen- ja
oahppamateriáladoaimmahat, tel. +358 (0)10-839 3117.